

Tebogo le koko wa gagwe
By Thapelo Matemane

Tebogo ke mosetsana wa mengwaga ye seswai wa lebalana le lesehlana. Ke mmamoratwa wa motho yo mongwe le yo mongwe mo lapeng la gabo gobane ke fejane.

"Etle o re opelele hle setlogolo sa koko," a realo sesi wa gagwe yo ba mmitšago Naledi.

O be a tla hloka matepe a opela ka bokgwari bja go makatša. O be a tla thabiša ba lelapa bohle.

" Morena boloka setšhaba sa gešo
O fediše dintwa le maswenyego
O se boloke, o seboloke
O se boloke, o se boloke
Setšhaba sa gešo, setšhaba sa South Africa
South Africaaa"

Bohle ba be ba tlo opela le yena ba thaba kudu ga go makatša empa o ile a makatša lelapa lohle la gabo ka kgwedi ya bohwa. Ka letšatši le lengwe o tsogile ka mahwibi a banna.

" O ya kae?" A botšišwa ke mmagwe.
"Lehono ke letšatši la bohwa" a araba ka myemyelo ye kgolo.
" Re a tseba bohle, bjalo o ya kae Tebogo?" Mmagwe a realo ka tlhobaelo.
"O se swenyege ka nna mma," a laela mmagwe.

Tebogo o ile a ya go koko wa gagwe gobane o mo tshepišitše go mo apeša diaparo tša segagabo e lego ntepa le lebole. Koko wa gagwe yo a mo ratago o be a mo roketše diaparo tša setšo tša go mo lekana. O ile a mo sebela gore a ye go ba retela gore ke yena mang.

Bohle ka moka lapeng ba be ba se ba itokišetša go apara segagabo bona. Tebogo o ile a tsena ka ntlong.

"Surpriseeee," a goa ka lethabo le legolo. O be a swanelwa mo go makatšago. Mmagwe o be a sa tsebe gore a reng ka bobotse bja morwedi wa gagwe
"Tebogo! o tšere kae diaparo tše?" Bohle ba botšiša ka makalo.
Tebogo o be a myemyela. Sesi wa gagwe Naledi o be a palelwa le go hlatholla tše Tebogo a di aperego.

" Nna ke mosebjadi setlogolo sa ntshotša. Ke ngwana lebalana le lesehlana , seilatšhila" O be a reta ka bokgwari bjo bo makatšago.

Mmago Tebogo le ba lapa ka moka ba ipotšiša gore Tebogo o ithutile tše ka moka neng, kae le gona a rutwa ke mang?

Ba rile ba sa ipotšiša dipotšišo, gwa napa gwa tšwelela koko wa Tebogo a tšhankgetše ka diaparo tša gagwe tša seAfrika.

"Mosetsana wa ka o kae?" Koko o ile a botšiša ka lethabo. Gateete Tebogo o ile a tšwelela. Bobedi ba ile ba thoma ka go bina makgagasa. Koko o ile a letša dinaka gomme ba bina.

Bohle ba ile ba šala ba maketše ebile ba lemoga gore tše ka moka Tebogo a phelago a di dira o ruta ke koko wa gagwe.

Bokoko ba bohlokwa maphelong a rena ka moka. Re swanetše re ba fe sebaka sa go re ruta gore re bo mang le gona re tšwa kae.

Kanegelo ye ke nnete.